



12. august 2021

Inatsisartut Suleriaasianni § 37, imm. 1 naapertorlugu apeqqutit uku Naalakkersuisunut saqqummiuppakka:

Naalakkersuisunut apeqqutit:

- 1. Sisimiuni august 2019-mi pinngortitami ikuallannermut assingusumik Kalaallit Nunaanni pinngortitami ikuallattoqalernissaanut Naalakkersuisut upalungaarsimanikkut pilersaaruteqarpat?**
- 2. Pinngortitami ikuallattoornissamut aarlerinaammik annikillisaaniarnermut tunngasuni nuna tamakkerlugu suliniutinik nutaanik suliaqartoqarpa?**
- 3. Pinngortitami ikuallattoorsinnaanermut aarlerinaat annikillisinniarlugu nuna tamakkerlugu malittarisassanik nutaanik atulersitsisoqarpa?**

(Inatsisartunut ilaasortaq Pipaluk Lyng-Rasmussen, Inuit Ataqatigiit)

Tunngavilersuut:

Silaannaap pissusaata allanngoriartornera pillugu nalunaarusiap ukiut ingerlaneranni kissarnerulernissaa, taamatullu aamma Kalaallit Nunaanni piffissat ilaanni panernersuaqalersinnaanera takutimmagu, pinngortitami ikuallattoornermut upalungaarsimanissamut pilersaarut ujartorpara.

August 2019-mi Sisimiut eqqaanni ikuallattoqarnerani, Sisimiuni upalungaarsimaneq ima amigartigivoq, allaat ikuallanneq qaammat sinnerlugu sivisussusilimmik atuulluni, Sisimiunillu Danmarkimit qatserisartunik 38-nik tikisitsisariaqarlutik taamatullu aamma Nuummit arlalinnik.

Taamanikkut ikuallattoornerup kingorna Pinngortitamut Avatangiisinullu Naalakkersuisoqarfik kommunini upalungaarsimasuutitat suleqatigalugit

INUIT ATAQATIGIIT

Inatsisartuni



pinngortitami ikuallattoortarneq pillugu isumasioqatigiinnissamik pilersaarusiulersaarpoq, peqatigisaanillu nuna tamakkerlugu suliniutinik nutaanik imaluunniit pinngortitami ikuallattoorsinnaanernut aarlerinaammik annikillisaajumalluni malittarisassanik nutaanik pisariaqartitsisoqarnerseq Naalakkersuisoqarfiup nalilersorumavaa.

Pinngortitami ikuallattoornerit sukkasuumik pisariitsumillu qaminneqarsinnaassappata, silaannaap pissusaanik ajornartorsiornerup nassatarisaanik ukiuni aggersuni atugassaqartilluta, upalungaarsimanissamik pilersaarummik pitsaasumik pisariaqartitsivugut, taamaammallu Pinngortitamut Avatangiisinullu Naalakkersuisoqarfik pinngortitami ikuallattoortarneq pillugu isumasioqatigiinnissamut pilersaarusiorsimanersseq, nunalu tamakkerlugu suliniutinik nutaanik suliaqartoqarsimanersseq, taamatullu aamma pinngortitami ikuallattoortarnerit pilersarnerat pillugu aarlerinaammik killiliisunik malittarisassiorsimanersseq apeqquteqarfigaara.

Apeqqutima ullut qulit iluanni akineqarnissaat kissaatigaara.